



La moda e maniera da viver dils carstgauns da pli baul ha interessau bia glied. L'exposiziun davart la bara d'ina dunna ch'ei morta denter 1685 e 1690 sin in glatscher el contuorn da Bravuogn ha fascinau.



Cussegliaer guvernativ Martin Jäger ha sutastrihau la sonda l'impurtonza dalla historia dalla claustra da Mustér per il Grischun.



Tocca d'ina missiala d'in carstgaun, anflada sigl areal dalla claustra da Mustér. Cheu ei vegniu scuvretg 112 baras ils davos rodund 30 onns. Ellas dateschan dils onns 1000 entochen 1350.

FOTOS H. HUONDER

Disas e modas da magliar e habitar d'antruras

Ils organisaturs dils Dis europeics dil monument a Mustér han purschii in program interessant e variont

DA HANS HUONDER / ANR

■ **Ils 21avels Dis europeics dil monument ein stai uonn sut il motto «a meisa». Las organizaziuns che sefatschantan dalla tgira dils monuments, la protecziun dalla patria e l'archeologia el Grischun han tschamiu Mustér sco liug da sentupada da quels. Cheu han ils visitaders saviu assister a differentas exposiziuns e baghetgs da muntada historica e monumental.** L'organizaziun da quei di ei stada els mauns dalla Tgira da monuments dil cantun Grischun en collaboraziun cun la Protecziun dalla patria dil Grischun ed il Center naziunal d'informaziun dil patrimoni cultural. Dalla partida ei denton era il Survetsch archeologic dil cantun staus. Ch'ils organisaturs han eligiu Mustér per quella interessanta sentupada ha in motiv special. Igl ei il giubileum da 1400 onns dalla claustra. «Quei giubileum ha praticamein obligau d'organisar quei di a Mustér. Tier la veta claustrala s'aida naturalmein era ina cultura da magliar», puntuescha cussegliaer guvernativ *Martin Jäger*, cau dil departament d'educaziun, cultura ed ambient. Il vicepresidente dalla regenza sereferescha sin il cudisch dalla regla da Benedetto da Nursia: Duas tschaveras caudas

per di duessen tonscher per in e scadin. *Martin Jäger* constatescha che duas tschaveras caudas erien pussevlas pli baul probablamein mo tier ils beinstonts.

Claustra e cultura

El beinvegni al Di europeic dil monument ha avat *Vigeli Monn* sutlingiau il motto dalla claustra da Mustér pil giubileum da 1400 onns: *Stabilitas in progressu*. «Igl ei buc in giubileum da mingadi ed in tal secapescha era buca da sesez en in temps cun midadas ella societad sco il mument.» Stabilitad stetti per ina cumunionza che s'engaschi el liug, mo en emprema lingia pil laud a Diu, il progress per in svilup ed in'adattaziun, denter auter dils baghetgs necessaris per la cumunionza claustrala. Il president communal da Mustér, *Francesca Cajacob*, ha accentuau l'impurtonza dalla claustra per la regiun en special ord vesta dalla spiritualitad e la formaziun. «Las disas da magliar han era signau ils baghetgs. Els ins construeschan cuschinas aviartas per ch'il cuschinier sappi sediscuorer culs hospis, ils auters vulan che negin miri ella cazzetta», di *Simon Berger*, il niev tgirader da monuments dil cantun Grischun. Il magliar hagi ina cultura tut speciala. Interessanta ei la cultura da magliar, respecti-

vamein dalla vivonda, era ord vesta dall'archeologia. Aschia dattan las restonzas terrestras da carstgauns la caschun era d'intercurir ils products che vegnevan pli baul sin meisa. Per quei motiv ha il Survetsch archeologic dil cantun Grischun purschii la sonda a Mustér denter auter la caschun da s'informar davart las disas da magliar d'antruras.

Glied gronda e robusta

Ils davos rodund trent'onns ein 112 fossas vegnidas scuvretgas sigl areal dalla claustra a Mustér. Ellas dateschan dils onns 1000 entochen 1350. Las examinaziuns antropologicas han furniu interessantas enconuschientschas davart quella glied. La presentaziun da quellas entras *Catherine Studer* al Di europeic dil monument a Mustér ei stada fascinonta. El rom da sia lavur da master ha ella intercoret glied. «Nus havevin constatau che las dunnas contonschevan ella media ina vegliadetgna d'entochen 48 onns, ils umens ina tala da 49 onns. Per da quei temps ei quei ina vegliadetgna sur la media. Singuls skelets anflai ein schizun da persunas ch'ei vegnidas pli che 60 onns veglias. Els carstgauns – oravontut denton las dunnas – eran fetg gronds. Quei docu-

mentescha l'ossa ferma e robusta. Probablamein ha quei da far enzatgei cun la vivonda. Nus supponin che la populaziun senutreva cheu oravontut da products da latg e carn», di *Catherine Studer*. Els skelets ch'ei vegni scuvretgs ein puspei vegni deponi en claustra. Els carstgauns satrai sigl areal dalla claustra eran convischins da Mustér ni conventuals. Avon che la baselgia parochiala a S. Gions ei vegnida erigida era quella dalla claustra la baselgia parochiala e sper lezza sesanflava il santeri. Dils skelets anflai tilan ils perscrutaders era la conclusiun ch'els carstgauns eran mo darar pertuccai da malsognas. Perencunter vegn constatau savens fracturas dall'ossa, per exempel dallas combas. «Ei croda denton era en egl che la gronda part dils skelets anflai eran d'umens. Nus savein sulettamein supponer ch'ei vegneva dau meins atenziun alla sanadad dallas buobas ni ch'ei deva schizun mazzaments da talas. In auter motiv pudess star en connex cun la claustra. Cheu vegnevan secapescha era il muntgs satrai», di *Catherine Studer*.

Novas dalla bara dil glatscher

Alla scuntrada davart ils monuments, la tgira dalla patria e l'archeologia a Mustér ei era vegniu presentau novas dalla bara

dalla dunna ch'ei vegnida anflada la stad 1992 sil glatscher da Porchabella a Bravuogn. Tenor igl archeolog cantonal *Thomas Reitmaier* settracta ei tier quella bara anflada d'ina singularitad: «Entochen quei di igl onn 1992 havevan ins adina mo anflau umens en territoris da glatscher. Ina dunna morta sin via sur in glatscher ora ei stau enzatgei niev.» Sin fundament dallas examinaziuns san ins oz che la dunna haveva ina vegliadetgna denter 20 e 23 onns e ch'ella era 1,57 meters gronda. Ins sa denton era ch'ella haveva buc ina buna sanadad. Probablamein eis ella morta en consequenza d'in accident en ina sfendaglia dil glatscher sin 3000 meters sur mar. Ella ha viviu il temps entuorn 1685: «Quei savein nus dir muort la vestgadira ch'ella purtava, principalmein ils calzers. Quels eran gia exponi pli baul alla moda.» Ultra dallas novas enconuschientschas dils carstgauns da pli baul han ils visitaders era giu la caschun da prender investa da baghetgs en claustra ed el contuorn da Mustér, mo era da scazis historics sco per exempel l'ovra monumental anflada avon paucs decennis en claustra. Ella datescha digl otgavel tschentaner. Cudischs da cuschinar historics e recepts grischuns ein i a prau cul motto «a meisa».

«Vitg ed identitad» – memorandum da baghegiar?

Specialists dil sector dalla planisaziun e l'architectura sefatschantan dall'identitad cul vitg

DA HANS HUONDER / ANR

■ **La vischnaunca da Mustér ha realisau in memorandum sco fil tgjetschen per l'architectura. Tgei porta in tal instrument? Da quella damonda ei ina discussiun al podi sefatschenta da la sonda suentermiezi ella Sala Peter Kaiser dalla claustra a Mustér.** La discussiun ei stada la part finala dils arranschaments pil Di europeic dil monument. Ella ei vegnida organisada dalla Protecziun dalla patria dil Grischun. Ell'introducziun alla discussiun ha la meinafatschenta da quella, *Ludmila Seifert*, taxau Mustér per in liug cun entgens interessants baghetgs monumentals. Sco auters loghens hagi denton era quella vischnaunca da sbatter cun construziuns meins plascheivlas. La discussiun suandonta sut la moderaziun digl architect *Daniel A. Walser* ha lu mussau ch'igl ei buca sempel da direger l'architectura d'in liug ed aschia procurar che quella va a prau cun las atgnadads localas. «Mintgin sa eleger sez igl architect per siu baghetg e quel sa esser d'ina outra tiara. Savens manca lu l'identitad cun las particularitads dil liug», di igl architect lumnezian *Gion A. Caminada*.

In fil tgjetschen

1969 ha il pievel svizzer tschentau il fundament per la planisaziun dil spazi, acceptond la lescha federala correspundenta. Entochen lu savevan las vischnauncas lubir baghetgs empau nua ch'ei era. Quei pass en direziun d'in nez ordinau dil terren avon maun ha pretendiu dils cantuns e dallas vischnauncas da scaffir zonas e relaschar leschas da baghegiar. «Oz eis ei aschia ch'il terren enteifer ils vitgs sto ve-

gnir nezegiaus pli optimal. Cheutras sedattan nunvulentamein era conflicts cun l'architectura e las atgnadads dil contuorn», di *Christian Wagner*, il cussegliaer da baghegiar dalla vischnaunca da Mustér ed iniziand dil memorandum. Quei instrument taxescha el per in fil tgjetschen per la cumissiun da baghegiar. «Quei memorandum ei in agid. Il problem ei denton che nus vegnin confruntai cun damondas da baghegiar finidas en-

stagl che nus savessen cussegliaer ils patrums gia avon ch'els inoltreschan quellas. Aschia sedattan secapescha conflicts», declara geru *Iso Mazzetta*, cau dil departament da baghegiar dalla vischnaunca da Mustér. Per la planisadra *Esther Casanova* duess in tal memorandum vegnir discussiun en connex cun ina revisiun dalla planisaziun locala: «Lu fuss ei era pusseivel da dar ad in tal dapli peisa per exempel enteifer la lescha da baghegiar.»

Ei drova sforzs

Tenor Gion A. Caminada drova ei sforzs davart dils architects e dils patrums per contonscher la finamira dall'identitad d'in baghetg cun il vitg: «En quei connex setschenta secapescha la damonda con lunsch ch'ins astga ir cun las pretensiuns d'in tal memorandum. Sch'ins vul contonscher ina identitad, lu sto il sistem daventar bia pli radicals.» Per *Johannes Florin* ch'ei sefatschentaus ils davos onns denter auter dalla renovaziun da differentes baghetgs vegls ei cultura da baghegiar ina qualitad che concerna il singul project, mo era il vitg sco unitad: «Tonaton eis ei pusseivel da far mo quei che la maiortad accepta. Ei setschenta secapescha era la damonda dalla finanziaziun. Tenor miu manegiar han las vischnauncas denton era en quei connex da riguardar ils interess publics.» Per *Iso Mazzetta* circumscriba il memorandum da baghegiar dalla vischnaunca las finamiras: «Quei ei in svilup sur onns. Da quel ei era la cuntinuitad enteifer ils gremis da decisiun dependenta. Las midadas persunalas che sedattan da temps en temps en nies sistem politic da milissa ei segiramein in dils problems en quei connex.»



La runda da discussiun. Da sen. Daniel A. Walser, Christian Wagner, Gion A. Caminada, Esther Casanova, Iso Mazzetta e Johannes Florin.

FOTO H. HUONDER